

Ilinalathala ng Partido Komunista ng Pilipinas-Bagong Hukbong Bayan sa Rehiyong Bikol


REBOLUSYONARYONG
PANGMASANG
PAHAYAGAN
NG BIKOL

Taon XXXI Blg. 1
Enero-Marso 2007

Patuloy na Pagbigong ng BHB sa Kontra-Insurhensyang Kampanya ng Rehimeng US-GMA

Aktibong depensa at magiting na opensa ang sagot ng Bagong Hukbong Bayan sa kontra-insurhensyang kampanya ng rehimeng US-GMA. Isa ang rehiyong Bikol sa prayoridad na rehiyon ng bigong Oplan Bantay Laya, at ng kasunod na Oplan Bantay Laya II.

Sa gitna ng masinsing operasyong militar, hindi itinugot ng BHB na may mawasak na larangang gerilya at madurog na baseng masa ng rebolusyonaryong kilusan.



Sa Masbate...

Labing-isang mga elemento ng Philippine Army, at ng Regional Mobile Force at Provincial Mobile Force ng PNP ang napatay at umabot sa 16 ang sugatan mula Agosto hanggang Nobyembre 2006.

Bigo ang kampanyang militar ng kaaway sa Masbate na umaabot sa lakas ng dalawang batalyon. Ginamit ang kumbinasyon ng isnayp, haras, ambus at kontra-opensa sa mga tangkang kubkob, upang paduguin ang tropa ng mga pasista.

Sa bayan ng Dimasalang, isa ang itinumba ng asintadong pag-isnayp ng BHB mula sa combined force ng Philippine Army, CAFGU at PNP. Nagdulot ito ng pagkataranta sa hanay ng mga kaaway kung kaya't sila-sila mismo ang nagkabarilan. Pagkatapos ng putukan, tatlo ang sugatan sa kanilang tropa.

Samantalang sa bayan ng Aroroy, halos kaparehong pangyayari ang naganap. Isang kaaway din ang patay dahil sa isnayp ng Hukbo at tatlo pa ang nadagdag nang sila rin ang nagkaputukan.

sundan sa pahina 2

Nilalaman

Enero-Marso 2007

Patuloy na Pagbigong ng BHB sa Kontra-Insurhengsyang Kampanya ng Rehimeng US-GMA	p. 1
Editorial: Oplan Bantay Laya II: Panibagong Bugso ng Pananalasang Militar	p. 4
Larawan ng Lantarang Pasismo sa Bikol	p. 7
Pahayag ng NDF-Bicol: Mapanlinlang, Walang Kwenta, at Peke ang "Civic Actions" ng SOLCOM at Civil Relations Service ng AFP	p. 10
Diwang Rebolusyonaryo Tula: Katatagan	p. 10
Pahayag ng Santos Binamera Kumand: Pamamarusa Sa Mataas Na Lider Ng Kilusang Kontra-Komunista Sa Albay	p. 11
Lider ng Berdugong Military Death Squad, Pinarusahan	p. 11
Batoy	p. 12

Aktibong Depensa ng BHB

Ang ipinagmamalaking strike force ng Provincial Mobile Force ng PNP ay dalawang beses na binigo sa kanilang mga tangkang pananalakay. Noong Setyembre 4, tinangkang kubkubin ng nasabing tropa ang isang yunit ng BHB na nakabase sa bayan ng Cawayan. Mabilis na pinaabutan ng masa ang mga kasama hinggil sa paabanteng kaaway. Kaagad na nakapusisyon ang pulang Hukbo kung kaya't unang nakapamutok sa mga kaaway. Dalawa ang kumpirmadong sugatan sa hanay ng mga pulis.

Noong Oktubre 30, sa bayan ng Mobo, inistrayk ng parehong pormasyon ng PNP ang isang platun ng BHB. Bago pa man nakapakat ang pulis, mabilis na nakapaghanda ng ambus ang mga pulang mandirigma. Tuso sanang sumabay ang mga pulis sa naglalakad na mga bata upang hindi sila mabira. Subalit matiyaga namang naghintay ang mga kasama na makalampas ang mga bata bago pinasabugan ng bomba ang huling bahagi ng pormasyon ng mga pulis. Patay agad ang isang kaaway habang malubhang nasugatan ang isa pa, na tuluyan na ring namatay.

Tatlo pang tangkang kubkob sa mga yunit ng Hukbo ang naganap sa mga bayan ng Palanas, Aroroy at isla ng Ticao. Sa gitna ng mga atakeng ito, wala ni isa mang napinsala sa hanay ng pulang Hukbo.

Habang nangabigo ang mga atake ng kaaway, magkasunod na matagumpay na ambus naman ang ilinunsad sa mga bayan ng Batuan at San Pascual. Isang pulis ang patay at dalawa ang malubhang sugatan sa pananambang sa Batuan, noong Oktubre 18. Sa San Pascual, dalawang elemento ng 22nd IB PA at isang CAFGU ang nasugatan sa sumunod na ambus noong Nobyembre.

Hindi naman nilubayan ng operasyong haras ang mga detatsment at istasyon ng pulis at militar.

Magkasabay na binira ang mga detatsment sa Armenia at Uson, at istasyon ng pulis sa bayan ng Baleno noong Setyembre 5. Dalawang detatsment naman sa Bayombon ang hinaras noong Nobyembre.

Sa Sorsogon...

Dalawa ang patay at apat ang sugatan sa tropa ng militar nang tangkang kubkubin ng isang seksyon ng 9th IB ang yunit ng BHB sa Sityo Kabibihan, Brgy Pangpang, Pilar nang madaling araw ng Enero 20. Nakapasok ang mga elemento ng Philippine Army sa mga bombang ipinakat ng Hukbo. Nakilala ang mga napatay na sina Pfc Belga at Pfc Binggoa. Sugatan ang CO nito na si 2Lt Rocky Vida. Kasunod nito, bandang alas nuwebe ng umaga, hinaras ng mga pulang mandirigma ang dalawang APC.

sundan sa pahina 3



Aktibong Depensa ng BHB

Sunud-sunod na inisnayp at hinaras ang SOT sa mga bayan ng Pilar at Castilla. Sa loob ng Enero, matapos ang tangkang pagkubkob sa hukbo, inisnayp ang mga SOT sa Bgy Bonga at Amomonting, Castilla. Namatay dito si Cpl Raymond Aycocho at isang sundalo ng Philippine Army.

Pebrero 17, alas 9 ng umaga, hinaras ang 12 elemento ng 9th IB na nakasakay sa trak sa Bgy Sacnangan, Pilar. Napatay dito ang tatlong sundalo at sugatan naman ang dalawa pa.

Nitong Marso 7, alas siyete kwarenta ng gabi, hinaras ang SOT sa Bgy Canjela, Castilla. Sugatan si Pfc Bejel Aycocho Jr. Marso 26, 4:45 ng hapon, pitong beses na pinutukan ang SOT sa Canjela, Castilla. Tatlo ang patay at isa ang sugatan sa armi.

Mula Disyembre 2006, kinuyog ng mga kaaway ang dalawang bayan, laluna ang Castilla. Layunin sana ng SOT na durugin ang rebolusyonaryong kilusan sa nasabing lugar. Ngunit, sunud-sunod na pinsala ang tinamo ng bagong pakat na 9th IB PA na nagmula pa sa Mindanao.

Sa bayan ng Magallanes, isang elemento ng 22nd IB PA ang itinumba matapos isnaypin ng pulang mandirigma sa baryo ng Busay.

Tuluy-tuloy naman ang pamamarusa sa sentro ng mga bayan ng Sorsogon.

Nitong Enero 21, pinarusahan ang CAFGU na si Jomar Gallanera sa Irosin. Nakadestino si Gallanera sa detatsment sa Brgy. Gabao ng nabanggit na bayan. Notoryus ang tropa ng CAFGU detatsment na ito sa mga pang-aabuso sa masa at pamamaslang ng mga sibilyan.

Matagumpay ring naparusahan noong Disyembre 2006 si Capt. Patrick Baesa sa isang sabungan sa parehong bayan. Si Capt Baesa ay intelligence officer ng 901st IBde PA na nakabase sa Villa Hermosa ng Daraga, Albay. Siya rin ang pangunahing nangasiwa sa mga military death squad na hawak ng nasabing brigada.

Sa Albay...

Sunud-sunod na pamamarusa ang ipinataw sa mga ahente ng kaaway at may utang na dugo sa rebolusyonaryong kilusan.

Ipinatupad ang hatol na kamatayan kay Fred Barrameda ng Brgy San Francisco, Legazpi City nitong Enero 24. Si Barrameda ay ahente at handler ng mga asset sa intelligence ng militar. Kinupkop at inalagaan niya ang mga pusakal na CAFGU na responsible sa pagpatay noong 1994 sa mga sibilyang sina Francisco Loquenarion at Domingo Lonceras. Ipinakubkob din ni Barrameda ang isang yunit ng BHB sa Brgy Maslog, Legazpi City noong 1996.

Pinarusahan din sa Daraga ang ahente sa saywar ng militar at mataas na lider ng Kilusang Kontra-Komunista na si Jun Loreno alias "Kuya Onyong" nitong Enero 18. Si Loreno ay mahigit 15 taong ahente sa paniktik ng militar at nagpagamit ng husto sa anti-komunistang paninira, pananakot at panlililalang sa mamamayan.

Nitong Enero 20 naman, nagkaroon ng labanan sa Brgy Bololo sa bayan ng Guinobatan. Patay si Pfc Raymond Villanueva. Habang ligtas na nakamaniobra ang yunit ng Hukbo na napalaban.



Sa Camarines Sur...

Tinambangan ng isang tim ng pulang mandirigma ang dalawang militar sa Brgy Inoyunan sa bayan ng Bula, nitong Pebrero. Patay si Sgt Valencia, ang timlider ng SOT sa nasabing bayan, at Pfc Domingo Alcala. Mula Hunyo 2006, nagsasagawa ng SOT ang mga kaaway sa magkakalapit na baryo ng Bula. Habang bumibyahe sa loob ng sonang gerilya sakay ng isang motorsiklo ang nasabing mga militar, sinamantala ng Hukbo ang pagkakataon upang birahin ang mga kaaway.

S

EDITORIAL

Oplan Bantay Laya II:

Panibagong Bugso ng Pananalasang Militar

Hinahagupit ng latigo ng lantarang pasismo ng 9th Infantry Division ang mamamayang Bikolano. Nananalasa sa mga prubinsya ng Sorsogon at Masbate ang nag-ooperasyong mahigit dalawang batalyon ng AFP-PNP-CAFGU sa isang sustinidong kampanyang militar ng 901st Brigade na nag-umpisa noon pang huling bahagi ng taong 2006. Kaalinsabay nito, tuluy-tuloy din ang kampanyang militar ng 902nd Brigade sa mga bayan ng Bula, Minalabac, San Fernando, Libmanan, Sipocot, Lupi, Ragay at del Gallego sa prubinsya ng Camarines Sur at sa magubat na bahagi sa bayan ng Labo sa Camarines Norte.


Ang pagdumog ng malalaking operasyong militar sa kanayunan ng Bikol ay may layuning maghasik ng malawakang pasistang teror sa masang magsasaka. Sa umpisa pa lamang ng mga sakyada sa mga bayan ng Pilar at Castilla sa Sorsogon, kaliwa-kanan na ang ginagawang paninindak at pang-aabuso ng mga militar sa mga sibilyan. Pang-iinteroga, pangungulata, pagpapakain ng lumang sedula, pambubugbog, pagdukot at maka-hayop na pagtortur bago patayin ang dinaranas na pagpapahirap sa kamay ng militar. Biktima nito ang pinaghihinalaan nilang mga taga-suporta at simpatisador ng NPA.

Sa desperasyon ng pasistang tropa ng rehimen, ang populasyong sibilyan ang pinagbabalingan ng hayok na kampanya nitong paglipol sa sinumang pinaghihinalaan nilang may kaugnayan sa kilusang rebolusyonaryo. Paparaming bilang ng mga di armado at walang kalaban-labang mga sibilyan ang binibigwasan ng mga kampanyang militar ng AFP.

Habang binibigwasan ng pagmamalupit at abusong militar ang mga kanayunan, sunud-sunod naman ang mga pampulitikang pamamaslang na isinasagawa ng mga military death squad laban sa mga lider masa at mga myembro ng militanteng mga organisasyon at party list, maging sa mga sentrong bayan. Ang paparaming bilang ng mga bangkay ang sukatan ng tagumpay ng kampanyang militar na ito ng pasistang rehimen ni Macapagal-Arroyo.

Naglalayong magkamit diumano ng "dramatikong resulta" sa pagdurog sa CPP-NPA-NDF sa loob ng dalawang taon ang Oplan Bantay Laya (OBL) II, na siyang bagong estratehiyang militar ng rehimen. Tinukoy ang rehiyong Bikol bilang isa sa pangunahing pambansang prayoridad na paglulunsaran ng mga kampanyang militar ng AFP, kasabay ang Timog Katagalugan, Timog Mindanaw, Silangang Kabisayaan at Gitnang Luzon.

Sa OBL II, desperadong naghahabol ang pasistang rehimen ng mabilisang resulta sa pagdurog ng rebolusyonaryong kilusan. Binibigyang lisensya nito ang pasistang tropa ng AFP-PNP-CAFGU para sa mas mabangis na pananalasa sa mamamayan. Mas pinasahol ang pasismo ng estado para sa layuning makapanatili sa poder si Macapagal-Arroyo.



sundan sa pahina 5

Magiting na Binigo ang Oplan Bantay Laya

Buong giting na linabanan at binigo ng rebolusyonaryong kilusan at mamamayan ang limang-taong programa ng Oplan Bantay Laya na ilinunsad ng rehimeng Macapagal-Arroyo mula noong taong 2001.

Sa Bikol, bigo ang OBL na madurog ang kahit isang larangang gerilya sa rehiyon. Patuloy na nakakapagpanatili at nakakapagpalakas ang buong pwersa ng CPP-NPA-NDF sa rehiyon sa gitna ng napakaigting na mga pananalakay at pamamaslang.

Ayon sa Romulo Jallores Kumand, nalipol ng BHB sa Bikol ang 171 elemento ng AFP-PNP-CAFGU at 109 ang nasugatan sa mahigit 213 labanan mula 2005 hanggang 2006. Sa panig ng BHB ay nagtamo lamang ito ng maliit na bilang ng kaswalti, mahigit 20 ang namatay at humigit kumulang sa 20 ang nasugatan. Signipikanteng bilang ng mataas na kalibreng riple at ilang masinggan ang nasamsam ng BHB sa mga taktikal na opensiba nito laban sa AFP at PNP.

Sa ikalawang hati ng taong 2005, binigwasan ng mga taktikal na opensiba ng BHB sa buong bansa ang pinakapusakal na mga tropa ng AFP-PNP-CAFGU. Matatag na linabanan ng mga yunit ng Hukbo ang mga tangkang pagkubkob ng militar at magiting itong nakapag-opensa sa gitna ng gipit na mga kalagayan. Ayon sa ulat ng AFP, ang taong 2005 ang nagtala ng pinakamatinding pinsala sa kanilang tropa sa buong kasaysayan ng paglaban nila sa insurhensya sa bansa.

Sa mismong pagtatasa ng General Staff ng AFP, idineklarang bigo ang OBL sa estratehikong layunin nitong durugin ang CPP-NPA-NDF. Kaya ilinabas nito ang panibagong estratehiyang militar na tinaguriang Enhanced National Internal Security Plan para mapagtakpan ang kanilang kabiguan. Kasunod nito, inaprubahan at



inanunsyo ng Malakanyang ang OBL II nitong Disyembre.

Maruming Saywar at Panlilinlang

Pinondohan at sinanay ang mga operatiba nito sa saywar upang maghasik ng anti-komunistang mga paninira. Nagkokorus ang mga tagapagsalita ng 9th ID-PA, Civil Relations Service-Civil Relations Unit (CRS-CRU), mga kumander ng mga batalyon at brigada at PNP upang mapagtakpan ang kanilang mga krimen at makakuha ng paborableng atensyon sa media. Mayor na bahagi ng kampanyang militar na ito ang opensiba nila sa maruming saywar.

Ang kabiguan ng kanilang tropa sa mga labanan ay pilit ilinilihim sa publiko ng mga tagapagsalita ng AFP-PNP na nakagawian na ang pagmamaniplula ng mga datos at garapalang pagsisinungaling. Pinalalabas din nila sa media na mas marami diumano ang namamatay na BHB sa labanan gayong wala naman silang maipakitang mga bangkay. Gasgas na ang nilubid nilang istoryang marami diumanong mga patak ng dugo sa mga lugar na inatrasan ng BHB matapos ang mga labanan.

Sistematikong binabansagang komunista at terorista ang ligal na demokratikong kilusan upang walang patumanggang sagasaan at paslangin ang mga lider at myembro nito.


sundan sa pahina 6

Di na nila pinag-iiba ang ligal na pakikibaka at mga di armadong mga organisasyon sa mga kombatan. Sinasadyang ibandera sa publiko ang sunud-sunod na pamamaslang at makahayop na pagpapahirap at krimen sa mamamayan upang maghasik ng teror. Awtomatikong ibinibintang sa CPP-NPA ang mga pampulitikang pamamaslang para palabasin na may purgahan diumanong nangyayari sa kilusang rebolusyonaryo.

Binuo ang mga civil-military operations (CMO) yunit sa mga Dibisyon at Brigada ng Philippine Army para mag-suplay ng mga materyales sa saywar at manguna diumano sa aktibidad sibiko na pinabobongga nito sa media. Di mapagtataktan ng pakitangtaong mga serbisyong medikal at dental ang labis na karahasan nito sa mamamayan. Nagkukumahog silang pabanguhin ang umaalingasaw na kabulukan ng pasistang rehimen at ng berdugong AFP-PNP. Layunin din nitong ipatanggap sa mamamayan ang pangit at malupit na todo gera ng rehimen.

Pagharap at Paglaban sa OBL II

Determinadong harapin at biguin ng mga yunit ng BHB at mga milisyang bayan ang panibagong bugso ng papananalasa ng pasistang kaaway sa pamamagitan ng pagpapaigting ng pakikidigmang gerilya. Ang mga platung gerilya at mga iskward ng milisyang bayan ay nakahandang magdependa at maglunsad ng mga taktikal na opensiba sa mga eryang sinasalanta ng mga kampanyang militar ng 9th ID. Habang puspusan namang naglulunsad ng mga gawain sa konsolidasyon ang mga yunit ng Bagong Hukbong Bayan sa mga eryang relatibong maluwag ang pakat ng kaaway.



Nakabatay sa malalim na pagkakaugat sa hanay ng masa ang lakas at kakayahan ng BHB na harapin ang pasistang atake ng kaaway. Mainit ang pagtangkilik at pagsuporta ng mamamayan sa kanilang hukbo habang labis ang pagkasuklam nito sa pasistang tropa ng AFP-PNP-CAFGU.

Dahil sa lalim at lawak ng baseng masa, mahusay na nakakapag-maniobra ang mga yunit ng hukbo maging sa mga eryang pinopokusang mga operasyong militar. Dahil sa mabilis at laging buhay na interbaryong mga linya sa komunikasyong pasabilis, kagyat na naipapaabot ng masa sa hukbo ang pagpasok at paglabas ng kaaway. Nasusubaybayan ang

mga operasyon ng kaaway kaya't kagyat na nakakapagplano ang BHB ng mga dagliang ambus, haras at isnayp, at nakakaiwas sa mga dependibang labanan. At sa pagpapakahusay sa teknika at taktika ng pakikidigmang gerilya, tiyak na epektibong haharapin at bibigwasan ng pinsala ang mga nag-ooperasyong militar.



Pangunahing target ng mga aksyong pamamarusa ng hukbong bayan ang mga death squad ng militar at pinakaberdugong mga alipures ni Macapagal Arroyo. Kakamtin ang rebolusyonaryong hustiya para sa mga kapamilya at biktima ng mga pampulitikang pamamaslang.

Sustinidong isusulong ang kampanya sa pagpapataksik kay Macapagal-Arroyo at higit pang papalawakin at papalakasin ang armadong pakikibaka upang tuluyang yanigin at pabagsakin ito sa poder. Ang higit na madalas at papasinsing mga taktikal na opensiba rin ang magsusulong sa digmang bayan sa higit na mataas na antas.

S

Larawan ng Lantarang Pasismo sa Bikol


Lansakang pasismo ang kabuluhan ng Oplan Bantay Laya II. Malawakang pananakot, pagdukot, pananakit at pagpaslang sa mamamayan ang mga kongkretong larawan ng pasismo sa Bikol. Sa iba't ibang pamamaraan, nagawa ng rehimeng Macapagal-Arroyo na maghasik ng dahas at terorismo ng estado.

Ang SOT ay lunsaran ng saywar at brutalidad. Ang operasyong kombat ay may parehong papel sa pagbubunsod ng epektong teror sa mamamayan. Pangunahing inasahan naman ang mga death squad sa pagpatay sa mga lider masa at myembro ng progresibong organisasyon at mga pinaghihinalaang may kaugnayan sa rebolusyonaryong kilusan sa mga lungsod, sentrong-bayan at maging sa kanayunan. Ang AFP, PNP at mga reserbang upisyal ng militar ay aktibo sa lahat ng kontra-rebolusyonaryo at kontra-mamamayang mga programa sa ilalim ng OBL II.

Sa Bikol, umaabot na sa 137 ang bilang ng mga pinaslang sa ilalim ng rehimen ni Macapagal-Arroyo. Daan-daan ang direktang tinakot, binantaan sinaktan at dinukot ng mga nagsasakyadang mersenaryo.

Narito ang pinakahuling mga biktima ng pampulitikang pamamaslang ng mga death squad ng militar:

- ✦ Disyembre 22, alas 11:30 ng umaga, pinagbabaril ng death squad sa Brgy Dancalan, Donsol, Sorsogon si Francisco Bantog, ang pamprubinsyang tagapangulo ng Bayan Muna-Sorsogon. Nagtamo si Bantog ng 20 tama ng bala sa katawan.
- ✦ Disyembre 31, alas 5:45 ng hapon, pinatay ang Provincial Coordinator ng Bayan Muna na si Rodolfo "Ompong" Alvarado sa Albay. Walong beses na binaril si Alvarado habang nagmamaneho ito ng sasakyan sa Brgy San Lorenzo, Ligao City. Si Alvarado ay pang-anim na nominado ng Bayan Muna noong eleksiyong 2004. Ika-122 siya sa mga miyembro ng nasabing party list na pinatay.
- ✦ Enero 21, namatay sa walong tama ng bala ang Brgy Kapitan ng Oras, Tabaco City na si Ananias Burce nang barilin sa Brgy Bantayan, Tabaco City. Pinagbibintangan ng militar na si Burce ay suporter ng NPA at tinutuluyan ng NPA na si Miguel Dayandante o Ka Cris.



sundan sa pahina 8

Larawan ng Lantarang Pasismo sa Bikol

✍ Enero 23, limang inosenteng sibilyan ang biktima ng serye ng pampulitikang pamamaslang sa Sorsogon. Dalawa rito ay miyembro ng Bayan Muna.

Alas 7:30 ng umaga binaril ng mga militar si Brgy Kagawad Charlie Mirandilla habang nasa kanyang taniman, sa Brgy San Vicente, Castilla.

Alas 12 ng tanghali, pinatay habang namamasada ng traysikel ang 52 anyos na si Ruben Ermino sa Brgy Tabi, Gubat. Ang biktima ay miyembro ng Bayan Muna. Positibong kinilala ng testigo ang isa sa dalawang salarin na isang alyas Babalu. Si Babalu ay kasapi ng Military Intelligence Group (MIG) na nakadestino sa bayan ng Gubat. Itinuturong sangkot din si Babalu sa pagpatay kay Atty Gojol, isang abogado sa karapatang pantao noong Disyembre 12.

Alas 7 nang gabi, binaril din ang 26 anyos na si Demetrio "Don" Imperial sa Sogoy, Castilla. Miyembro rin ng Bayan Muna si Imperial.

Dalawa pang magsasaka ang pinaslang sa magkahiwalay na lugar sa mga bayan ng Gubat at Matnog.

✍ Enero 22, natagpuan sa Brgy Sabloyon, Ligao City ang bangkay ng miyembro ng BHB na si Miguel "Ka Cris/Ugo" Dayandante at ng drayber na si Julio Camero na taga Brgy Tabiguian, Tabaco City. Si Dayandante at Camero ay dinukot ng mga ahente ng militar sa isang bahay sa Tabaco City noong Enero 18 ng madaling araw. Bakas sa katawan ng mga biktima ang palatandaan ng malupit na pagpapahirap at tortyur. Nakagapos ang mga kamay at tadtad ng bala ang katawan ng mga ito.

✍ Pebrero 15, alas 9:30 ng gabi binaril ang miyembro ng League of Filipino Students na si Farly Alcantara, 22 anyos, taga Brgy Uno, Mercedes, Camarines Norte. ()

Nagtamo ito ng mga tama ng bala sa ulo. Ayon sa security guard ng eskwelahan, bandang alas 8:15 ng gabi, dumating si Alcantara sa Camarines Norte State College galing sa Naga City. Tumambay pa ito sa may gate ng eskwelahan bago ang insidente. Binaril ito pagkasakay sa kanyang motorsiklo.

Abusong Militar sa Sorsogon

Humahaba rin ang talaan ng mga biktima ng abusong militar. Pinakamalala ngayon ang sitwasyon sa Sorsogon, ang prubinsyang prayoridad ng kampanyang militar ng 9th ID. Ayon sa pinakahuling ulat ng Human Rights Fact Finding Mission (Pebrero 27, 2007) anim na baranggay sa Castilla, Sorsogon ang may kaso ng panggugulpi, pagpatay at pangungulata ng militar. Ito ay ang Miluya, Mayon, Burabod, Amomonting, Dinapa at Dapdap. Ang mga baranggay na ito ay mahigit tatlong buwan nang pinepeste ng SOT ng 901st Brigade sa kumand ng 9th Infantry Division. Maliban sa anim na baryo, may SOT din sa Monte Carmelo, Oras, Comadcad, Maracabac, Quirapi, Tomalaytay at apat na kanugnog nitong baranggay.



Pilit ding pinatatao sa mga tsekpoynt ang mga sibilyan para kumilala at magturo sa mga masang may kaugnayan umano sa

N P A .

sundan sa pahina 9

Larawan ng Lantarang Pasismo sa Bikol

Inoobliga ang mga tanod na mangasiwa sa mga tsekpoynt at pagpapa-logbook ng mga aktibidad ng mga tao. Kapansin-pansin rin ang paglalatatag ng napakaraming tsekpoynt. Sa dose-kilometrong kalsada may labintatlong tsekpoynt na nakalatag.

Kaiba sa mga unang disenyo ng SOT na nagpuposturang "mabuti" habang pailalim na ibinabaon ang pangil (sa pamamagitan ng operasyong intel at saywar), ang SOT sa Castilla ay agad at lantarang nagpamalas ng bangis. Ito naman sa kongkreto ang katangian ng ikalawang yugto ng Oplan Bantay Laya.

✦ Enero 22, alas nwebe ng gabi, sinunog ang bahay ni Joel Mantes sa Sitio Kotad Pacris Dam, Brgy Pandan, Castilla, Sorsogon. Tabla ang dingding ng nasabing bahay. Walang tao sa bahay ni Mantes nang isagawa ang arson (panununog).

✦ Enero 26, alas nwebe ng gabi, sinunog ang bahay ni Roberto Borselo sa Sityo Tipon-tipon, ng parehong barangay. Wala ring tao sa bahay nang sunugin ito ng mga nag-i-SOT.

✦ Sa Brgy Dinapa, Castilla, walangawang pinagbubugbog ang isang 52 anyos na may sakit na tuberkulosis o TB. Si Rody Sevilla ay pilit pinaaaming may kaugnayan sa mga NPA. Kinulata naman at isinubsob sa putik si Totoy Bernarte, 40 anyos.

✦ Binugbog at kinulata hanggang matanggalan ng mga ngipin ang 32 anyos na magsasakang si Edgar Loteno, sa Sityo Kotad, Pacris Dam, Brgy Pandan, Castilla. Binugbog din ang 60 anyos na kababaryo ni Loteno na si Walter Bulos.

✦ Sa Brgy Quirapi, Castilla, tatlong suntok ang tinamo ni Francisco Lonseto, residente ng Brgy Macalaya.

✦ Enero 30, alas 9:00 ng umaga, pinakuha ng militar sa kanyang bahay at dinala sa barangay hall ng Caboracan, Castilla si Ramil Benitez. Kitang-kita ng mga taumbaryo ang pagkulata kay Benitez hanggang mawalan ito ng malay. Nang magkamalay, inimbestigahan ito at pilit pinaaming binabasehan siya ng NPA.

Kasabay sa pisikal na mga pananakit sa masa, pinairal din ang food blockade at pagkontrol sa pang-ekonomyang aktididad.

Malinaw itong paglabag sa batayang karapatan ng tao sa kabuhayan. Lalong pinaghihirap ng mga militar ang dati nang naghihirap na masa.

Inobliga ang mga taumbaryo na mag-logbook sa tuwing aalis ng bahay para magtrabaho sa bukid, palayan, koprasan at lati at maglawig ng kalabaw. Ipinagbabawal ang pagpunta sa ibang lugar, maglabas ng mga hayop sa mga baryong ginagamit umano ng NPA, paglalakad sa gabi at ang maglabas ng bigas at mga "doma" galing sa sentro patungo sa mga sityo nang hindi nagla-logbook. Bawal din ang bumili ng pagkain na higit sa konsumo ng isang pamilya sa maghapon.

Wala nang anumang pagsasalarawan ang maaaring bumago sa esensya ng Oplan Bantay Laya. Malinaw na larawan ito ng kalupitan. Ang pinasidhing yugto nito — ang OBL II, ay ang kasalukuyang instrumento ng estado para magsagawa ng pinaka-karumaldumal na mga krimen laban sa mamamayan.





Pahayag ng NDF-Bicol:

Mapanlinlang, Walang Kwenta, at Peke ang “Civic Actions”ng SOLCOM at Civil Relations Service ng AFP

Ayon sa pahayag ng NDF Bikol, walang kwenta at mapanlinlang ang mga isinasagawang “civic actions” ng Southern Luzon Command ng AFP at ng CRS. Bukod sa kakatiting at tinipid na mga pakitang-taong “serbisyo”, ginagamit ito ng pasista at berdugong AFP upang pagtakpan ang napakahabang listahan ng mga karumal-dumal na krimen nito sa mamamayan.

Pinatatampok ng SOLCOM at CRS sa media ang diumano’y mga “civic action” sa ilang piling baryo at bayan, habang ikinukubli nito ang paghahasik ng pasistang lagim at teroristang karahasan sa mamamayan sa mas marami at mas malawak na lugar, paliwanag ni Ka Greg Banares, ang tagapagsalita ng NDF-Bikol.

Ipinagyayabang sa media ni Maj. Ramon Ronard Rosario ang bilang ng “nakinabang” diumano sa medical at dental mission ng CRS sa Brgy Bantigue, Masbate City, pero tahimik sa lawak ng pinsala at epekto sa napakaraming mamamayan ng mabangis na kampanyang militar ng 901st Brigade-PA sa mga bayan ng Pilar at Castilla, Sorsogon.

Ang mga “civic action” na ito ay bahagi ng “Civil-Military Operations” (CMO) ng AFP na isang pangunahing nilalaman ng Oplan Bantay Laya II upang pabanguhin ang umaalingasaw na kabulukan ng pasistang rehimen at ng berdugong AFP-PNP. Layunin din nitong pagandahin at gawing katanggap-tanggap sa mamamayan ang pangit at malupit na “all-out war” ng rehimen ng Arroyo na naka-balatkayong isang “holistic approach”.

Ayon sa nakarating na ulat sa NDF-Bicol, mistulang umiiral ang batas militar sa mga baryong saklaw ng Pilar at Castilla, Sorsogon at talamak ang mga paglabag sa karapatang pantao ng mamamayan na nakasaad sa CARHRIHL at sa mga internasyunal na batas ng digmaan tulad ng Geneva Conventions.

Nagkakamali ang SOLCOM at ang CRS kung inaakala nilang matatakpan ng mga mapanlinlang at pekeng “civic actions” ang karumal-dumal na mga krimen ng militar sa buong Bikol. Lantad na sa maraming mamamayan ang kahungkagan ng CMO ng AFP, at hinding-hindi nila malilimot ang mga krimen ng rehimen ng Arroyo at ng AFP at PNP, panapos ni Ka Greg.

S

Diwang Rebolusyonaryo

Katatagan

Ni Kasamang Nap*

sa umaga’t maghapong pagtahak ng landas
matatarik na bundok, talampas at burol
hirap at pagod di alintana
uhaw, gutom at dusa ang aming kasama

pagsapit ng gabi kami namahinga
sa tabi ng sapa,
ilog na mababato
madulas sa paa
mga tinik at sukal ang sa amin nakaamba
ngunit sa pagsumikap lahat ay nawala

pagod at puyat ang aming kasama
sa bahay ng masa kami namahinga
para makaipon ng lakas
nang makapagpreserba sa gawaing mahalaga

**Nagmula sa uring magsasaka si Kasamang Nap. Sa rebolusyon na niya napaunlad ang kanyang kasanayan sa pagbasa at pagsulat. Ang tulang ito ay isa lamang patunay ng kanyang pagpupursige na matuto at magpanday ng sarili upang ituon ang kanyang buong pagkatao sa paglilingkod sa rebolusyon. Isa ring mahusay na mandirigma si Ka Nap. Namartir siya sa isang matagumpay na reydy sa detatament sa San Vicente, Camarines Norte noong Agosto 2006.*

S



Pahayag ng Santos Binamera Kumand:
**Pamamarusa Sa Mataas Na Lider
 Ng Kilusang Kontra-Komunista Sa Albay**

Ipinatupad ng mga operatiba ng BHB ang hatol ng hukumang bayan na kamatayan sa aktibong ahente sa psywar ng militar at mataas na lider ng Kilusang Kontra-Komunista (KKK) sa Albay na si Jun Lorenzo alyas "Kuya Onyong" nitong Enero 18 ng gabi sa Maroroy, Daraga.

Lehitimong military target si Lorenzo dahil sa pagiging sagadsaring kontrarebolusyonaryo nito at mahigit labinlimang taong aktibong lumaban sa kilusang rebolusyonaryo sa Albay, pahayag ni Ka Florante Orobia, ang tagapagsalita ng BHB-Albay.

Dating kasapi ng BHB noong 1980's, sumuko si Lorenzo sa AFP noong 1987 sa Metro Manila, narekrut bilang isang ahente sa paniktik ng militar, at nagpagamit ng husto sa anti-komunistang paninira, pananakot, at panlilinlang sa mamamayan ng Albay nang maging pinuno ng KKK.

Sa ilalim ng Oplan Bantay Laya, ginagamit ang mga organisasyong binuo ng militar tulad ng KKK sa paghahasik ng paninira laban sa mga militante at progresibong organisasyon, at pagkatapos ay nagiging target ng mga pampulitikang pamamaslang ang mga lider at kasapi nito.

Tuwirang kinakatulong ng militar ang mga kasapi ng KKK, ilang elementong nagtaksil sa kilusan, at selektibong mga yunit sa intelidyens ng militar sa pagmamanman, panghaharas, at pampulitikang pamamaslang. Kabilang sa mga kaso ng pampulitikang pamamaslang sa prubinsya ang pananambang sa pinakamataas na lider ng Bayan Muna sa Albay na si Rodolfo "Ompong" Alvarado noong Disyembre 31 sa Ligao City.

S

Lider ng Berdugong Military Death Squad, Pinarusahan

Si Philippine Army Captain Patrick Baesa ay ang pangunahing nagdisenyo ng malaganap at brutal na pamamaslang ng mga military death squad sa mga lidermasa at aktibista sa prubinsya ng Sorsogon. Ang kanyang pangunahing death squad na pinangangasiwaan ay nakabase sa bayan ng Irosin.


Ilan sa mga naging biktima ng brutal na pamamaslang ng military death squad sa prubinsya ay sina Max Frivaldo, Ding Uy, Brgy Capt Neal Futralan, at Rei Mon Guran.

Si Capt Baesa ay 34 taong gulang at ipinanganak sa Brgy San Pedro, Irosin. Nagtapos siya sa PMA noong 1997. Nakadestino siya sa 901st IBde na nakabase sa Camp Villa Hermosa, Daraga, Albay. Dito, itinalaga si Capt Baesa bilang intelligence officer. Siya rin ang pangunahing nangasiwa at nagsuperbisa ng mga death squad na hawak ng brigada.

Bago pa naitalaga sa Bikol, nadestino muna si Capt Baesa sa Mindanao. Nailipat siya sa Eastern Visayas at naging tauhan ni Gen Jovito Palparan. Taon 2005, nang mailipat si Gen Palparan sa Central Luzon, nailipat rin si Capt Baesa sa 901st IBde.



sundan sa pahina 12



Lider ng Berdugong Military Death Squad, Pinarusahan

Napili niyang base ang Irosin dahil ito ang kanyang bayang sinilangan. Marami rin siya ritong kamag-anakan, kakilala at kabisado niya ang lugar.

Ilang buwan ding matyagang inipon ng mga operatiba ng BHB ang mga kinakailangang datos upang mailarga ang pagbira kay Capt Baesa. Isang malaking kahinaan ng nasabing militar ang pagkahilig nito sa sugal na sabong. Ito ang sinamantala ng mga kasama.

Nobyembre 27, 2006, pinakatan ng isang yunit partisano si Capt Baesa sa cockpit arena ng bayan ng Irosin. Habang nasa kasagsagan ng laban ng dalawang manok,

kumilos ang trigger man. Humakbang ng dalawa, umakyat sa rehas, at lumapit sa pwesto ni Capt Baesa. Itinutok ng trigger man ang kalibre .45 sa likurang bahagi ng ulo ng target at pinutukan ng isang bala. Patay kaagad ang target sa oras na 8:10 ng gabi.

Habang nagkakagulo ang mga tao at mga alalay ni Capt Baesa, nagregrup na ang trigger man sa support team. Ilang minuto lamang ay natipon na ang buong yunit ng Hukbo na nagsagawa ng matagumpay na bira at naglakad na lamang palayo sa pinangyarihan.